

四庫全書

集部

欽定四庫全書

元詩體要卷十三

明 宋公傳 編

五言長律

詩律屢變意度則一南朝沈休文輩始尚排偶音韻
相諧屬對精密至唐沈宋又拘以聲病約句準篇名
曰排律杜子美有百韻是編蓋傳其似唐者

正月十一日朝回即事

虞集

宮樹春光合霓旌拂曙來天光臨閣道雲氣轉蓬萊晝

漏沉沉鼓晨尊灑灑盃香霏簾底霧樂殷殿前雷祥瑞
儀曹奏珍淳尚食催舞庭分鷺序效獻過龍媒融雪微
生草輕風不動埃老人南極至王母上方回玉色何多
喜金華得重陪裁詩賀新雨西閣待門開

靈壁石

奎章閣有靈壁石奇絕名世御書其上曰奎章
玄玉有勅命臣集賦詩臣集再拜稽首而獻詩

曰

禹貢收浮磬堯堦望喬雲自天承雨露拔地起絀緼擊
拊聲音合衡從玉兆分巨鼇三島力威鳳九苞雲辨位
資乾坎為山填幅員固知興寶藏不假運神斤書帙侵
春潤香爐借宿薰烟光晴冉冉波影晝泫泫融結繇元
化登崇荷聖君瑞於龜出洛重若鼎來汾柱立尊皇極
盤安廣帝勛詎云陳秘玩因愿獻前聞

壽趙集賢

揭傒斯

集賢大學士趙國公王開府慶八十應制

昭代雍熙日詞林賦頌時紫宸丹詔出甲第五雲垂裕
廟青宮裏王公玉樹枝朝趨陪綺角夕侍接龍夔際會
真難及飛騰已在茲暴公初繡斧方叔更藩維霜簡驚
風裁天官肅羽儀還迎代邸入竟被漢文知位望躋三
少權衡俯百司每蒙天黼黻直許國著龜鳳鑰廣寒殿
龍舟太液池羽觴春侍宴玉座夜觀基德業前賢繼辭
華後進推高情晞廣受餘事擬徵珪全趙山河富瀛洲
日月遲九卿看綵服八表表厖眉皇覽逢初度殊恩介

壽祺黃封中使出玉食尚饗移國老陳嘉慶羣公播威
辭禮非前代有施及老臣宜福祿何人並忠貞百歲期
聖心誠念舊政用作臣規

壽姚承旨

楊載

上帝黃金闕仙人白玉堂
皇猷資黼黻大筆主文章
間氣生奇偉休期際吉康
四朝承寵渥多士仰輝光
盡發琅函秘重繙石室藏
成書侔二典有道述三皇
碩望高天下榮光近日傍
謨謀須稷契羽翼藉園黃
上殿扶鳩

杖開筵接蟻觴九重師道德千載合明良共說綸如綽
能摧繡作裳人思興禮樂國待理陰陽舊族名先著高
門慶甚長賜書踰萬卷納笏過三床轉覺勛庸盛還欣
體力強朱顏朝映日素髮曉欺霜已注長生錄曾傳却
老方宜齊周李耳遠邁漢張蒼松柏深逾秀芝蘭久益
芳願公多壽祉仍見子孫昌

送丘子正之海鹽

珠生滄海底玉韞碧山中夜氣交明月陽精現白虹有

賢兼重價當代振英風好學由天性能書至國工知名
傳冀北作賦擬河東始欲徵揚子旋聞薦楮公陰符難
獨美遺教實爭雄絕藝雖宜進奇才自不同交游傾上
國掄選屬南宮鄧禹官初試匡衡對漫通海邦終寂寞
學館尚穹崇已注千人錄當成五典功星辰皆在水渤
澥信浮空把酒歡何限乘槎興不窮文章趨浩瀚物態
入牢籠子必登芸閣吾方守桂叢索居彌寡陋荒業孰
磨礱弗獲披雲霧唯思對華嵩知音期郭泰流俗易王

充江海從茲逝飄飄任轉蓬

送趙鎮撫諸葛彝

先世逢昭代軍功信不誣起家從汴水佐武上灤都將
種由來異如公自爾殊生身長七尺襲爵摠千夫華嶽
生秋隼池溟出雋駒虎威天下少馬服世間無手畫三
軍勢名成八陣圖握奇思効古報國欲捐軀重慎機謀
定沉雄義勇俱妙齡當穎脫逸氣應時須鄉邑初來鎮
城居靜不虞霜晨鐘韻匝月夜鼓聲紆編戶無局鋪羣

偷在覲覲令嚴知約束民阜足懽愉論事資高識推誠
得遠謨從衡司馬法爛熳太公符紫服垂鞶帶金牌綰
采繡指麾真肅肅訓練豈區區燕角彎繁若荊銘利鏃
鐔淬刀生紫電拔劍長青莆秋獵山崗闊冬行石嶺孤
鴈飛驚快鶻菟走辟狂盧執策親調驥回鞭笑殫狐衣
圍夔子錦冒威矧賓旣野曠平如掌羣奔健若杓豈惟
矜殺獲庶以範馳驅威集開長宴高譚半老儒酒餘聽
節樂歌罷對投壺詩好從人和門開有客趨前榮列經

史玩器雜璫瑜臨帖朝揮筆看書夜照珠武夫雖糾糾
見客亦于于好尚今如此隨從有是夫為能崇雅素自
足草驕麤武甸今知習文風世所敷信曾思孔孟獨恥
論孫吳感激明時用騫騰壯士徒築營開細柳引水種
雕茨阜鵠風中放蒼鷹雪裏呼望雲思海曲乘月坐庭
隅爪代何云急矛戈植韃蘆荷峰知不遠旗旆促歸途
儒服成謠頌黎氓重嘆吁始茲居鎮守綽爾見規模賤
子便荒僻平生惡囁嚅耕芸常荷鍤著述或操觚學問

勤三省才名愧八厨濟時雖有志晦迹遂如愚沙際榆
林斷江頭柿葉枯銀瓶持別酒玉盃點凝酥轉權愁看
燕鳴櫓恨聽烏短吟依遠寄好在五雲衢

寄福建杜廉訪使君

范梈

臬府羣工表言官百世公君王咨稷卨臺閣起黃龔吳
越聯閩服蠻夷偃漢風九州諸道右一柱萬流中虎豹
精神肅豺狼道路通青冥行勁銳白日貫精忠芥繡飄
秋隼泉阿達夜蛩壺冰元自潔瘴雨不勞空賤子嗟何

幸微心逝盡躬望來方切切告別匪匆匆祇為文科重
尤慚祖餞隆客魂銷海鵠病骨碎溪蟲謬敢辭王事私
嘗泣老翁髮緣思母白顏每應人紅尚俠彛倫薄其如
祿養豐以茲三逕撫猶獲二天蒙上幙刑雖簡滄洲道
未窮請將心萬疊寫入嶧陽桐

寄王繼學

楊載

聖主敷皇極元臣建上台虛心求俊乂削迹去奸回拜
命超凡品知君秉大材淳風隨日播公道應時開負鼎

資烹飪操刀貴刺裁鉅鋒行肯綮異味合鹽梅廟議常
參決朝班復共陪艱難須仗助豁達遠嫌猜遺佚聞風
起英豪接踵來經綸非董賈辭藻亦鄒枚在野思羅致
盈庭想輟推既將龍作友惡假鳩為媒走也今畱此公
乎可念哉執竿猶海上扶耒即岩隈自守幽人意寧虞
俗子咄舊遊辭玉府故事憶金臺落魄江湖阻蒼茫歲
月催丹心徒耿介素髮已毵耄勿謂交如水能忘恥及
壘飛黃當駕馭猶足異駑駘

贈魏虛舟少府

西蜀文章伯東吳閥閥家族傳貞觀舊躡繼信陵遐雅
度人難測高名衆共誇為楨材不小韞櫝玉無瑕鳴鳳
占諧吉乘龍偶契嘉三牀邀納笏萬弩護排衙世賞官
仍及朝參寵復加天顏乘眷顧地肺侈光華緩步方鳴
玉高情欲泛槎番然歸翠麓如爾奉黃麻彭澤還栽柳
河陽不種花投閒消日月訪故略烟霞臘蟻常開宴春
魚每看義興來恒放逸賓從任喧譁閣靜褰珠箔窻虛

閱綠紗琴彈多古雅詩就輒妍姱願作梁間燕徒慚井
底蛙執鞭曾莫侮抱瑟敢長嗟戀戀情終在悠悠道若
賒春風吹去旆翹首又天涯

七言長律

唐以來作七言排律者甚少其音律和協體制整齊
者獨杜子美送鄭著作及清明二首耳王仲初寄韓
侍郎等作次之今米格調近唐若所錄者亦不易得
也

御溝 宋聚

決決穿雲出澗初，千迴百折到皇居。
行人不敢來飲馬，稚子時能坐釣魚。
內史府前晴滉漾，雲巖觀後晚舒徐。
波漫畧約通丹禁，風颺輶輜動翠裾。
三月霏烟着楊柳，九天涼露濕芙蕖。
荒唐莫說流紅怨，自是清漣解起予。

次韻宋顯夫 虞集

御溝雪融三月初，鳬鷺鴻鴈摠來居。
葡萄水綠可為酒，楊柳條青堪貫魚。
逆遡天河起箕尾，滉漾雲海浮青徐。

舟前花落傍飛燕堤上風來濕舞裾翠輦時留金轡裏
錦波不著玉芙蓉臨流宋玉偏能賦莫待東都客問予

次韻杜德常博士

祕閣沉沉便殿西頻年立此聽春鸝風搖翠岸新生柳
雨浥銅池舊產芝玉几由來常咫尺衡門此日遂棲遲
申生欲去柴車在杜甫長吟雪鬢垂墨沼游魚翻宿藻
畫簷飛燕冒晴絲山中竹簟清如水應夢釣天九奏時

題喀爾子山尚書凝香小隱

羣玉府中香滿袖凝香亭裏看花開綵雲近席微風動
紅日當窻好客來西海珊瑚階下長東家胡蝶雪中回
竹深每聽尚書履池煖時分太液杯鳳唳浮烟金錯落
鵝羣浮水白氍毹人間應得函封帖青李來禽繞舍栽

送張可道嘉定府太守

成廷珪

秦中百二漢關河曾記乘驄舊所過棧道地形天下險
嘉州風物古來多分符又協三刀夢入境先聞五袴歌
父老扶筇親引道將軍負弩疾撫呵錦袍錯落金為帶

白馬連翩玉作珂興學固當崇俎豆防邊還為戢干戈
四川畫省勞詢問一郡蒼生望撫摩樓倚青冥來萬境
山橫紫翠接三峨題詩別館魚堪寄退食公堂雀可羅
西蜀考功當第一他山有石為君磨

五言絕句

絕句五言語短意長一唱三歎近體中之最為近古
者也蓋亦只是律詩結尾四句謂之小律含蓄無限
意思讀者宜深體味之

春日劉因

游絲困無力欲起重悠揚芳草落花滿相思春晝長

牧廢苑趙孟頫

一片中原地紛紛幾戰爭至今將不去留與後人耕

龍口岩

峭石立四壁寒泉飛兩龍人間苦炎熱僊境已秋風

石鼓嶺胡助

經過石鼓嶺不見石鼓文兩澗流黃葉半山生白雲

秋江

范梈

雲裏衡陽鴈網下武昌魚石門秋共遠江樹雨餘疎

遠浦帆歸

揭傒斯

冥冥何處來小樓江上開長恨風帆色日日誤郎回

烟寺晚鐘

朝送山僧出暮喚山僧歸相喚復相送山露濕人衣

江天暮雪

孤舟三日住不見有人家昏昏竹籬處只恐是梅花

山市晴嵐

近樹參差出行人取次多板橋雙路口此世幾回過

江州庾樓

賀復孫

宿鳥歸天盡浮雲薄暮開淮山青數點不肯過江來

煙蘿境

虞集

玉女乘煙霧松間采薜蘿飛行了無迹明月送空歌

漏舟

春水如天上秋潭見月中如何列禦寇猶欲待冷風

紫霞滄洲

洞裏琴鳴澗洲前棹入雲擬尋雲谷叟同訪武夷君

無倪舟

三周華不注水影浸青天不上銀河去空明擊棹還

觀心

炯炯燈留室微微息若存仰探當月窟俯察識天根

蘭在 彭炳

蘭在在楚澤蘭在在楚山古人見心易今人見心難



白鷺

李祁

脩然雙白鳥近水立多時慣識幽人意相看揔不疑

御馬

揭傒斯

朱纓金絡轡黃帕錦鞍韉神閒意更逸初下赤墀前

錢選宮人圖

安熙

露冷月華白悠悠方寸心夫君渺何許悵望碧雲深

太白酒船圖

趙孟頫

瀟灑稽山道風流賀季真相思不相見愁殺謫仙人

秋山行旅圖

老樹葉先雨浮嵐翠欲流西風驢背客吟斷野橋秋

河梁泣別圖

虞集

落葉滿長安秋風漢節還裁詩寄歸鴈三月到天山

宣和墨竹寒雀

灑墨寫琅玕深宮春晝閒蕭條數枝雪不似紇干山

汪華玉子昂蘭石

海內出珊瑚枝撐碧月孤鯨人拾翠羽泣露得明珠

又

抱玉下天河繞叢秋露多天寒翠袖薄日暮欲如何

信上人春蘭秋蕙

揭傒斯

幽叢不盈尺空谷為誰芳一徑寒雲色滿林秋露香

題松雪竹石

李孝光

幽篁碧悄悄白石白粼粼帝子吹笙罷月明愁殺人

子昂畫

陳旅

汀洲木葉下斜日倚湘絨我欲採芳草洞庭秋水多

倪氏雨竹

落日楚江深
鷓鴣啼遠林
相思不可見
池上寫春陰

段氏扇子

江上竹枝歌
為君鹽兩娥
秋風團扇底
零落黛痕多

甄慧腐瓜行蟻圖

虞集

瓜腐來螻蟻
梧生致鳳凰
荒園空宿雨
阿閣自春陽

雙鴛圖

戢翼石梁陰
秋風日夜深
使君莫行野
江水蕩人心

畫扇柳蟬

不食遂終日長吟亦老翁
金盤几秋露玉樹一絲風

畫鴨

揭傒斯

春草細還生春雛養漸成
茸茸毛色起應解自呼名

畫鷹

李昉

勁翮排霜戟天寒氣轉驕
草間狐兔盡側目望青霄

孫安之松楸圖

趙孟頫

墳墓在萬里宦遊今五年
誰人無父母掩卷一潸然

柯敬仲雜畫

虞集

雨過蒼苔石雲生野岸泉幽懷春冉冉稚子秀娟娟

又

鐵石餘生色冰霜作曉妍春雷明日起何處尚龍眠

又

雨過黃陵廟蒼梧雲正愁何時倚虛幌對此滿林秋

又

峽口春雲重江南夜雨多水深桃葉渡風急竹枝歌

熊太古畫

海內此亭古幽村春事多扁舟歸未得江上已生波

過釣臺

趙蒙齋

君因鄉相隱我為利名來羞見先生面黃昏過釣臺

獨夜

趙孟頫

秋風動林葉夜雨滴池荷孤客睡不着亂蟲鳴更多

望鄉臺

楊維禎

望鄉臺上客秋至望鄉關中原遮望眼可奈咽支山

飲馬窟

長城飲馬窟飲馬馬還驚寧知嗚咽水猶作寶刀鳴

妲己圖

小白竿頭血新圖入漢廷宮中雙燕子齊作牝鷄鳴

胭脂井

昨夜韓擒虎金陵奏凱迴井中人不死重帶美人來

焦仲卿妻

生為仲卿婦死與仲卿齊廬江同樹鳥不過別枝啼

朱厓令女

關珠爭兩死兩死獨誰當
關吏不垂泣青天應雨霜

連理枝

王家連理木昨夜一枝零
野藤沿別樹相托萬年青

玉鏡臺

郎贈玉鏡臺妾掛菱花盤
安得咸陽鏡照郎心肺肝

纜舟石

江邊纜舟石纜解不留痕
長恨浮萍草難全結縷根

聞過鴈

樓頭聞過鴈，隻影不成雙。
一夜狂夫夢，相思到九江。

夜彈瑟

靜夜彈湘瑟，扁舟在鶴灘。
九峰江上見，渾似九疑山。

玉蹄騶

銀腦玉蹄騶，金鞭問妾家。
窻開桃葉渡，小艇在荷花。

女蔓草

誓作女蔓草，不作天羅瓜。
女蔓纏樹死，天蘿挂西家。

子夜吳歌

麴塵波欲動紅心草已生朝來夾城道流車如水行

自君之出矣

自君之出矣燕去復燕歸思君如荔帶日月抱君衣

又

自君之出矣草青復草黃思君如魚鱗夜夜守君房

桂水五千里

桂水五千里春來波浪深地消青草瘴花發乳蕉林

又

桂水五千里瀟湘雨氣空衡山七十二望見女英峰

又

桂水五千里南風大府開象王新貢入蛟女送珠來

又

桂水五千里上有鸚鵡洲美人生遠思今夜在南樓

康節像

太平經兩世好景出三天身在羲皇上心在天地前

陳搏像

飄飄扶搖子脫世一蹤輕何預家國事饒舌紫皇星

蘇子瞻像

貢師泰

老龍起深夜來聽洞簫聲酒盡客亦醉滿江空月明

六言絕句

絕句六言始於漢司農谷永之作其說具項平菴家
說中自唐王維效曹陸體賦之其後諸家往往間見
而必前兩句對起後兩句散結或有四句皆對者皆

不對者

聶空山畫扇

虞集

客來山雨鳴澗客去山翁醉眠花外晴雲靄靄竹邊秋
月娟娟

山水扇

宋本

野屋不知今世山色似含古春岑寂渾無啼鳥荒寒略
有行人

秋江釣月圖

趙孟頫

塵土染人衣袂烟波着我船
窻為問行歌都市何如釣

月秋江

二畫 祝蕃

斷岸蒼烟喬木小橋野店村春一曲晚風樵唱脩然林

下相逢

又

疊嶂半空懸瀑平林隔岸層臺風雨一川烟浪扁舟何

處歸來

江邊

李孝光

江邊孤樹猶碧天際白雲自流七十二灘浩蕩夕陽照
見歸舟

危太朴雲林圖

丁復

天台萬八千丈雲林三十六峰幾載山中獨憶今朝江
上相逢

墨鴈

趙孟頫

鴻鴈栖栖遵渚黃蘆索索鳴秋羨殺承平公子筆端萬

里滄洲

送高中丞南金

喀爾庫庫

鸚鵡洲邊明月鳳凰臺下清風人物江山兩絕才高不
為時容

何得之先生故居

揭傒斯

可憐古井門外依舊鐘樓屋西何處高吟痛飲黃花翠
竹都迷

又

心事巢由以上文章陶阮之間千古高墳保下白雲明
月青山

又

軋軋機聲日莫依依楊柳春柔膝下中郎小女曾聽唱
我高郵

又

頭上烏紗分贈篋中縞楮相醺不道別時長別誰知愁
是真愁

又

屋上青山未老門前白日常新他日咎夔稷禹安知不
是斯人

七言絕句

絕句者截句也句絕而意不絕感煩就簡最為難工
有截律詩前後四句或截前四句後四句至有截中
二聯者必還意活動有含蓄不盡之思承接之間更
加轉換宮商自諧雖止四句有餘味焉

薊門雜興 趙復

何物愁來白髮生
月高霜冷正參橫
一聲寒角城雅起
吹盡梅花怨未平

吟人 滕賓

吟人瘦倚曲闌干
酒醒香消午夢殘
燕子不來春社去
一簾疎雨杏花寒

絕句 趙孟頫

春寒惻惻掩重門
金鴨香殘火尚溫
燕子不來花又落

一庭風雨自黃昏

又

湘簾細織浪紋稀
白苧新裁暑氣微
庭院日長賓客退
滿池芳草燕交飛

又

梅花半落雪飄零
楊柳青青江水生
一夜東風吹鴈過
江南江北總多情

又

庭槐風靜午陰多。睡起西窗日影過。自笑老夫無復夢，
閒看行蟻上南柯。

又范村

幽人不出戶長開。看盡春風長綠苔。多謝有情雙燕子，
暫時飛去又飛來。

又馮翼

竹外斜陽賣酒家。雨餘紅杏壓枝斜。天涯無限傷春意，
自向風前拾落花。

偶書 孟希

錦衣公子馬如龍
射鴈歸來半醉中
過盡好春渾不管
揚鞭閒弄柳花風

南歸偶書 余闕

帝城南下望江城
此去鄉關半月程
同向春風折楊柳
一般離別兩般情

又

二月不歸三月歸
已將行篋捲征衣
殷勤為報家園樹

緩緩開花緩緩飛

春晴
劉辰翁

江柳長天草色齊
新晴何物不芳菲
無因化作千蝴蝶
西蜀東吳欸欸飛

又

新燕池塘綠雨肥
初晴水映日光微
角巾猶帶花梢濕
纔倚闌干見絮飛

春日雜詠
圖克坦公履

東風簾幙半塵埃
歌舞臺空畫不開
試問雙飛新燕子
今年社日為誰來

春日戲成

王沂

東風吹草綠
茫茫陌上行
人指北邙
千古英雄成底事
銅駝依舊卧斜陽

春日即興

趙孟頫

春陰柳絮不能飛
雨足蒲芽綠更肥
正恐前呵驚白鷺
獨騎款段繞湖歸

春日絕句 巴延子中

幾片殘紅點客衣
小溪流水鰕魚肥
畫橋盡日無人過

楊柳青青燕子飛

秋思 孫存吾

鴈落西風字字沉
嫩涼偷入藕花心
眼前多少關心事

付與寒蛩徹夜吟

四景 張天師

春

初日暉暉照翠苔
庭前昨夜碧桃開
一簾香霧微風動
知是仙人騎鶴來

夏

深院棋聲日正長
博山添火試沉香
道人鞭起龍行雨
帶得東潭水氣涼

秋

天際涼風似水流
山中瑤草不知秋
黃庭讀罷無餘事
鐵笛一聲閒倚樓

冬

養就還丹不怕寒
獨騎黃鵠上雲端
笑談借得天家雪
散作琪花滿石壇

到京

楊載

城雪初晴薺菜生
閒門深巷少人行
柳梢聽得黃鸝語
此是春來第一聲

赤壁

龍仁夫

路呂摧袁虎視眈
阿瞞氣勢捲江南
磯頭一霎東風轉

天下江山自此三

博浪沙

陳孚

一擊車中膽氣豪
祖龍社稷已驚搖
如何十二金人外
猶有人間鐵未銷

潯陽

范梈

露下天高灘月明
行人西指武昌城
扁舟未到心先到
卧聽潯陽譙鼓聲

老鼠關

陳孚

春風又送使旄還
笑掬清波洗瘴顏
從此定知身不死
生前先過鬼門關

陵母墓

太傅功名半紙殘
百年人子痛如山
緣何方寸非徐庶
忍死慈親一劍間

漂母墓

英雄未遇亦堪羞
一飯區區不自謀
莫笑千金酬漂母
漢家更有頡羹侯



范增墓

七十衰翁兩鬢霜
西來一笑火咸陽
平生奇計無他事
只勸鴻門殺漢王

露筋廟

白鳥飛空萬箭攢
玉肌一夜粉痕乾
殘碑不用誇筋露
要露平生鍊肺肝

姑蘇臺

貢師泰

當時何事太情多
不悟危機出薜蘿
一夜月明天似水

吳王臺上越王歌

孝友堂

范梈

堂前多種紫荊枝
堂下能啼白髮兒
但恨後來風雅廢
南陵不似古人詩

陳平章席上題琵琶亭

龍仁夫

老大蛾眉負所天
忍將離恨寄哀絃
江心正好看明月
却抱琵琶過別船

甄氏訪山亭

陳觀

欽定四庫全書

元詩體要

卷十三

天

水流花落石生雲日靜風暄草欲薰老去風流猶未減
一丘一壑要平分

揚州客舍

余闕

平山堂前折楊柳小紅樓下買梅花一年兩度揚州客
人似鄉間店似家

又

船頭澆酒祀神龍手擲金錢撒水中百尺樓船雙夾櫓
唱歌齊上呂梁洪

瀟湘夜雨

李冶

遠寺孤舟墮渺茫
雨聲一夜滿瀟湘
黃陵渡口風波暗
多少征人說故鄉

杜陵浣花

趙孟頫

春色薰人苦不禁
寒驢馱醉晚駸駸
江花江草詩千首
老盡平生用世心

青山白雲圖

黃潛

十年失脚走京塵
忘却青山與白雲
忽見畫圖疑是夢

落花涼葉思紛紛

蘇李泣別圖

李竹所

我去君留可奈何明朝烟雨隔關河當年胡婦分攜處
想見中郎淚更多

昭君出塞圖

虞集

天下為家百不憂玉顏錦帳度春秋如何一段琵琶月
青草離離詠未休

明皇擊梧圖

李俊民

不使梨園弟子知
太平音在鳳凰枝
一朝野鹿銜花去
長恨秋風落葉時

明皇吹簫圖

楊維禎

廷臣諫疏不須裁
笛譜新番阿濫堆
揀得漁陽雙玉琯
紫雲吹斷鳳凰臺

吳王納涼圖

甘立

六月長洲水殿涼
酒酣揮袖倚新粧
芙蓉露冷秋雲薄
回首西風響簾廊

又虞集

百頃芙蓉水滿堤
綺窗只在畫橋西
羊車薄暮過湖曲
驚起鴛鴦不並棲

美人圖

徐秋雲

玉佩鳴璫照素秋
綠雲扶夢下瑤樓
滿湘一片芙蓉雨
珠箔沉沉不上鉤

秋胡戲妻圖

趙孟頫

相逢桑下說黃金
料得秋胡用計深
不是別來渾未識

黃金聊試別來心

閨人望遠圖

范村

郎行不用苦悲辛
久別心知萬事親
看取江邊垂柳樹
最先零落最先春

四皓圍碁圖

黃潛

當局沉吟只謾勞
區區勝敗直秋毫
顛羸蹶項非君事
賴有安劉末著高

李白翫月圖

余闕

春池細雨柳纖纖
手倦揮毫日上簾
想得停杯江海夜
月明照見水晶鹽

家藏劉阮圖

楊維禎

兩壻元非薄倖郎
仙姬已識姓名香
問渠何事歸來早
白首糟糠不下堂

錢舜舉折枝芙蓉

虞集

白髮多情憶劍南
秋風溪上看春酣
剪來一尺吳江水
擬比千花濯錦潭

水仙花圖 陳棻

莫信陳王賦洛神凌波那得更生塵
水香露影空青外
留得當年解佩人

柯博士墨竹 甘立

嶰谷春深落粉香
拂雲和露倚蒼蒼
月明後夜吹簫過
應是伶倫學鳳凰

張氏風竹圖 陳棻

湘江風捲白頭波
北渚雲深帝子過
欲採瑤芳渡江去

翠衫輕薄晚寒多

題畫 虞集

夢裏江南憶舊遊
明璫翠佩不勝愁
一鉤纖月清如水
吹笛何人共彩舟

白畫眉圖 陳旅

隋家宮妓掃長蛾
銷盡波斯百斛螺
化作雪禽春樹頂
遠山無數奈愁何

畫障 虞集

汾陽積雨水生波
翠袂黃裳晚棹過
珠樹月明花婀娜
鳳毛春暖錦婆娑

曹將軍馬

高秋風起玉關西
踣鉄歸朝十萬蹄
貌得當時第一足
昭陵風雨夜聞嘶

牧牛圖

揭傒斯

楊妃血染馬嵬坡
出塞昭君淚更多
爭似阿婆牛背上
夕陽一曲太平歌

題風雨圖

許衡

南山已見霧昏昏便合潛身不出門直到半塗風雨橫
愴惶何處覓前村

關山風雨圖

張礎

山雨凝寒氣不開江濤拍岸雪成堆漁翁慣識風波惡
天際孤舟已早迴

風雨迴舟圖

張孔孫

風雨來時撥棹回濟川心事有誰知停舟且做江湖夢

浪靜風恬未是遲

春浦帆歸圖

孟攀麟

涵空水色碧於苔
照眼山光翠作堆
疑是桃花源上客
輕舟天外得春來

題扇

貫雲石

紅旭如鉛海上來
蒼蒼烟霧小蓬萊
東風昨夜醇如酒
吹得桃花滿樹開

元詩體要卷十三

欽定四庫全書

元詩體要卷十四

明 宋公傳 編

七言絕句

書事 劉因

當時一線魏瓠穿直到橫流破國年
草滿金陵誰種下
天津橋畔聽啼鵑

又

卧榻而今又屬誰江南四月見旌旗
路人遙指降王道

好似周家七歲兒

又

唱徹芙蓉花正開
新聲又聽採茶哀
秋風葉落踏歌起
已覺江南席卷來

汾州北席里石氏節婦

陳旌

北里高樓晝掩扉
水銅光冷上苔衣
寸心誓比南山石
汾水秋風鴈不飛

題羅節婦傳後

羅氏之夫貶海上有強之為妻者遂自縊死
歲晚良人去未歸堂前有客著新衣此身只為韓憑死
化作鴛鴦海上飛

金陵送友

黃潛

青陽河畔杜鵑啼歸路如絃定不迷應到故山叢桂裏
笑人騎馬聽朝鷄

送人歸廬州

貢師泰

淮水春深綠似苔故人天上恰歸來扁舟繫在門前柳

猶記行時手自栽

送人遊吳

楊載

客路逢春雪乍消
眼前愁思轉相撩
垂楊染作黃金色
舞遍東風萬萬條

又

金溝河上始通流
海子橋邊繫客舟
却到江南春水漲
拍天波浪泛輕鷗

送樊時中余闕

桃花灼灼柳絲柔立馬看君發鄂州
懊惱人生足離別不如江漢共東流

別樊時中廉使

光祿橋西惜解攜
春星欲傍露盤低
自來宮柳多離怨
更著城烏在上啼

宜春贈別

郭昂

微茫烟浪浦帆開
一曲琵琶淚滿腮
江水不如潮水好
送人東去復西來

寄達無善

李孝光

城上烏啼欲閉門
瀟瀟風雨近黃昏
無端畫角連雲起
鐵鑄梅花亦斷魂

寄朱希顏

城頭鼓鑿雨淒淒
舟子牽船上惡溪
曾有行人回首處
兩邊楓樹郭公啼

又

江邊鴻鴈下年年
客子何由兩鬢玄
七十二灘秋月白

荻花風落釣魚船

寄余承慶

楊元正

袞袞紅塵客未歸
秋風吹老芰荷衣
幾回欲寄相思字
不見瀟湘一鴈飛

贈郭判官

范梈

慈烏夜夜向人啼
幾度紗窗兔魄底
自有平安三百字
無因却寄大江西

贈月經歷

全晉

楊柳絲絲不繫鞍送君容易別君難
遙知今夜相思處人隔關山月正寒

思親

貫雲石

天涯芳草亦婆婆三釜淒涼奈我何
細較十年元下淚不如慈母線痕多

有懷

銜素中

雨過幽庭長綠苔東風時為拂塵埃
無人曾見春來處門外桃花只自開

懷郭安道

周馳

江南江北路茫茫
明月高樓各異鄉
旅鴈叫雲天似水
故人今夜泊瀟湘

杏花始開小酌

安熙

杖藜吟遶去還來
收拾春光入酒杯
自是風花要題品
等閒蜂蝶莫相猜

山家

劉因

馬蹄踏水亂明霞
醉袖迎風受落花
恠見溪童出門望

鵲聲先我到山家

山行

揭傒斯

稍出羣山復涉溪溪光山色冷相輝
青裙獨踞溪邊石
不顧行人自濯衣

清明郊行

李孝光

清明處處麥風斜
詩老得閒長在家
遠樹小村千瓦雪
不知落日上梨花

遊茅山

盧摯

澗邊瑤草洞中花
細水流春帶碧沙
昨夜山瓢酒初熟
道人无暇讀南華

登福山遇僧偶出

黃清老

欲扣禪關未有詩
滿山空翠濕人衣
竹間倚杖到西日
試看白雲歸未歸

又

鷲嶺雲深杖屨幽
竹風松影共悠悠
何人分得僧家榻
坐看南山一片秋

征南口號

杜瑛

春早雲南麥已黃
瀘江蒸霧水如湯
馬蹄半帶陰山雪
變作人間六月涼

發南康赴江州

陳思濟

繡斧重持白髮翁
路人猶說宦情濃
一帆又下潯陽去
羨殺雲間五老峰

移官淮東別杭州

湖上雲烟百態新
湖邊幽趣屬閒身
春風揚子江頭路

白首行人又問津

發通州

貢師泰

日日思歸未有期
及歸翻恨數年遲
開船聽得吳歌起
絕似閭門送別時

過京口

高克恭

北來朋友不如鴻
幾箇西飛幾箇東
多少登臨舊臺觀
闌干閑在夕陽中

過三合驛

范梈

一春歸計又蹉跎
窮粵風光奈病何
揔有青山千萬疊
行人長少鷓鴣多

渡端州峽

權郎得便沂清流
忽報舟前曉霧收
蠻語酌人翻自苦
好山不敢問何州

再渡白溝

趙復

瘦馬柴車出白溝
河山依舊繞神州
都將百萬生降戶
換得將軍定遠侯

過洞庭

唐珙

玉簫吹老洞庭波，一夜湘君白髮多。
醉後不知天在水，滿船清夢壓星河。

曉發山館

薩都拉

夢迴山館月西斜，曙色千峰動紫霞。
杜宇一聲山竹裂，鷓鴣飛上海棠花。

蘭溪舟中

水底霞天魚尾赤，春波綠占白鷗汀。
越船一葉蘭溪上，

載得金華一半青

巴陵雨中

陳益稷

鴉拂平林鴈入空
黃花行李老秋風
如何一夜江南夢
盡在巴陵細雨中

下豫州

甘東溪

壯懷忍共白雲閒
孤負僧房屋半閒
賣却牢愁三萬斛
載將明月入西山

江上作

吳全節

短棹輕舟幾度過月明江上竹枝歌故山歸去青依舊
華髮添來白未多

山寺早起

劉因

松窻一夜遠潮生斷送幽人睡失明夢覺不知春已去
半簾紅雨落無聲

雨中睡起

何失

閉門連日雨霏霏一醉誰憂生事微睡起不知風色暮
北窻花氣濕人衣

卧庭

范村

朝來忽見樹藏鴉，碧草無邊徑路斜。
佳客不來春雨盡，

山禽啄遍小桃花。

惜花

陳思濟

長恐花殘漫欲狂，千回百匝繞花傍。
高張翠幄朱闌護，

山雨溪風未易防。

因官伐松

胡尊生

大夫去作棟梁材，無復清陰護綠苔。
只恐江頭明月夜，

誤他千里鶴歸來

題赤城站壁

虞集

莫怪扁舟不早歸，斜風細雨濕蓑衣。
天缺月滿江心定，贏得閒身在釣磯。

友人見訪不過

黃清老

君乘白鶴下青冥，我入春山聽曉鶯。
可惜小樓風雨過，無人收拾萬松聲。

出東城

趙孟頫

欽定四庫全書

元詩體要

卷十四

十

野店桃花紅粉姿
陌頭楊柳翠烟絲
不因送客東城去
過却春光揔不知

萬壽宮館舍作

劉因

來時殘雪點征衣
落盡庭花尚未歸
夢裏不知身是病
春衫歸路馬如飛

登北邙山

楊果

魏家池館姚家宅
佳卉而今采作薪
水北水南三二月
舊時多少看花人

薊門聞笛 趙復

夢裏繁華醉裏遊倚天青壁

缺

危樓梅花哀怨成何事

吹破中原二百州

杭州聞角 梁棟

聽徹哀吟獨倚樓碧天無際思悠悠誰知盡是中原恨

吹到江南第一州

鍾陵聞鐘 范梈

中年江海夢靈皇夜半聞鐘似上陽一百八聲猶未已

更無雲外鴈啼霜

東署聞鴈

久別雲林舊草亭江南都邑歲凋零可憐此夜長空鴈
政在青松樹底鳴

日南感懷

陳孚

老母越南垂白髮病妻燕北寄黃昏瘴烟蠻雨交州客
三處相思一夢魂

感事

王中立

雪花如席朔雲低一曲琵琶淚滿衣
山色似眉江似練
何時明月送將歸

又

歸來江令頭空白遠道金山淚暗垂
關月自低霜自落
尊前莫唱鷓鴣詞

又

長夜漫漫夢不成
可堪涼月透疎櫺
唾壺敲碎無人語
獨坐空堦看曉星

哭亦周弟

趙文

去日相攜涉畏途歸來形影自相扶
倦行小憩荒山路
怕聽深叢叫鷓鴣

哭具韜

杜彥之

交朋來哭我來歌
喜傍山家葬薜蘿
四海十年人殺盡
世間埋少不埋多

悼程妻許氏

王士熙

綺窗花雨盪春風
寶鏡塵昏杼柚空
三祭未筭兒未冠

醉倚蒼江看落花
阿舒扶上短轅車
河山萬里皆劉裕
五柳春風自一家

又貢師泰

烏帽青鞋白鹿裘
山中甲子自春秋
呼童點檢門前柳
莫放飛花過石頭

白玉蟾像

虞集

日出扶桑積雪高
海空天淨絕纖毫
每看劍氣衝銀漢
知是吹簫詠碧桃

忍教夫壻嘆孤鴻

悼隣妓

揭吳斯

西子湖邊楊柳花
隨風飄泊到天涯
青春遇着歸來燕
銜入當年王謝家

陶淵明像

鄧文原

詩中甲子春秋筆
籬下黃花雨露枝
便向斜川頻載酒
風光不似義熙時

又彭炳

煩暑不能寐望鄉憶宵征開門海月白高枕林風清不
飲畏投轄將歌思濯纓誰家橫短笛吹盡楚關情

贈周景遠田師孟

趙孟頫

與子同客帝王州一日不見如三秋風高氣肅鴈聲急
天晴日暖蛛絲遊籬下黃花為誰好水邊紅樹令人愁
世間萬事可撥遣日日痛飲醉即休

趵突泉

灤水發源天下無平地擁出白玉壺谷虛只恐元氣泄

自贊題白雲求陳可復所寫像

歸來江上一身輕野服初成拄杖行祇好白雲相伴住
天台廬阜聽鐘聲

拗體

拗體乃唐律之再變古今作者不多過律之難處必
得俊句時出而用之則奇健矣觀者亦不可不知存
此以脩一體

暑夕

范梈

歲早不愁東海枯
雲霧潤蒸華不注
波濤聲震大明湖
時來泉上濯塵土
冰雪滿懷清興孤

商德符畫幽篁古木

虞集

湘君宮在洞庭湖
幽篁古木龍所都
石壇雨長碧苔蘚
水屋風動青珊瑚
老人欹枕看螻蟻
嫠婦停舟聽鷓鴣
江湖蜀客問來往
商公商公今有無

老松怪柏圖

李材

仙人解衣礪礪羸
造化慘淡秋毫端
枝柯千尺入層漢

笙簫萬壑鳴驚湍堂中日月不可老壁上雷雨何當乾
我來醉卧北窻下夢跨黃鵠天風寒

子昂畫馬

鄧文原

奔騰駿骨雲路長蕭洒神鬃風露涼沙場春牧草肥雨
野微秋嘶楓殞霜三關戰士黃金甲五陵俠客紅絲韁
朝羈暮絡祇腸斷華山烟樹遙蒼蒼

送張思廉歸桐江

成廷珪

讀書不謁萬乘君挾策肯傍諸侯門嘯歌蘇臺晚山碧

濯足洞庭秋水渾千金未易買駿骨一飯豈足哀王孫
風塵拂衣且歸去高卧桐江烟水村

送人遊武當郭翼

武當諸峰何壯哉大朵小朵青蓮開玄聖中居天地戶
赤日下照金銀臺神龜六眼電光走山鬼一脚雲頭來
道人再拜望北極應帶滿身星斗回

送客李孝光

攜手出門倚惆悵北風吹樹丹楓林柵中鷄鳴天地醒

城頭鴈去江湖深行人萬里少歸夢烈士向來多苦心
東西相望道路遠一書會抵雙南金

送劉好古歸武昌

遊子結束向何處城中雪花幾尺圍去家萬里多夢見
辭親十年今始歸道士吹簫赤壁下行人泊舟黃鶴磯
我亦張帆拂南斗卧看明月去如飛

送唐長卿赴常州教授

丁復

三茅斷作湖嶼碧常州昇州猶比鄰山君化鶴去問客

水鳥銜魚來獻人釀酒未嫌官舍冷開倉長恐士家貧
絕嗟一槩鳴琴地杏花開門消却春

送趙虛一歸金陵

周克善

真人道眼照九圍芙蓉瑤冠黃錦衣相從雲龍霄漢上
獨攜琴鶴烟霞歸南樓吹笛閑折柳北山杖藜歌采薇
明日度關瞻紫氣帝鄉杳杳雙鴻飛

送張使君棄官學道詩卷

揭傒斯

至元天子朝萬國任丘使君謝宦歸門前未能車馬客

身上已着朝真衣致君堯舜在豪傑洗耳巢由何是非
栖霞觀裏青松樹唯有白雲終日飛

贈楊茂才

范梈

西峽淅淅風雨生南塘蕭蕭樓觀清玄蟬抱樹一時靜
老鶴懷山終夜鳴放形海嶽等雲水託好音書猶弟兄
未知此別會何日為予商歌無限情

次韻吳成季宗師赤城阻雨

虞集

人間伏日當早休道上馬車如水流神仙不愁風雨夕

父老已知禾黍秋誰憐司馬久多病唯有杜康能解憂
北溟之鵬六月息載我八極歌遠遊

次韻剛父無逸游南山

趙孟頫

絕頂清秋凌紫烟登臨應費酒如川平生能着幾兩屐
負郭何須二頃田初日出雲光射地雙溪入湖波接天
升高望遠我所愛青壁無路何當緣

夜歸

薛漢

有客有客胡不歸長安三見秋葉飛警霜老鶴夜不寐



吊月孤鴈寒無依紛紛北里厭梁肉落落西山甘蕨薇
人生窮達各有命何須中夜泣牛衣

夜起

張翥

月落未落山四更鷄鳴不鳴霜滿城起看北斗寒掛地
俯聽長河流有聲今夕何夕耿無寐千古萬古難為情
欲持心事出門去哀歌坐待東方明

阿城即景

荒村無更聽鷄號東方明星出已高寒氣著衣露零落

秋聲出樹風蕭騷文園遊倦苦多病騎省賦成嗟二毛
老我茲行亦何事故山西望興滔滔

壽趙君澤母一百七歲

丁復

南康校官致仕日北堂夫人長壽身一百歲後又七歲
千萬人中能幾人王母娥眉曾不老諸孫鶴髮但重新
桐川之水東到海海上蟠桃樹樹春

寒食節獨出城南

張翥

一百五日官事休城南騎馬雨初收街頭賣餅火正冷

原上踏青人乍遊荒塚烏鳶爭曉祭野牆桃李自春愁
年年一掬思親淚忍付長河東去流

碣山成簡卿心遠亭

虞集

作亭臨河河水渾草樹遠屋啼鳥聞夢回枕上彭城雨
目斷簷前芒碣雲歸來黃菊有佳色坐老青山無垢氛
但願尊中長得酒曲阿莫問舊參軍

江山覽勝樓

張翥

白雲東南相蕩浮中有隱者之飛樓千峰影落華蓋晚

一水寒通彭蠡秋
鮫人機杼或聞響
山鬼窟宅疑藏幽
為問仙家借黃鵠
我欲題詩來上頭

與陳敬初同舟北遊題餞行卷後

陳敬

我愛天台陳敬初
少日辭家即遠圖
上書可擬賈生策
入闕便棄終軍繻
八月官河秋水大
三江親舍暮雲孤
名成歸去歲未晚
卜鄰有約依東吳

有懷敬仲伯生

甘立

眉山老仙丹丘生
三日不出風雨驚
玉文深沉發奇秘

天藻動盪流芳英錦鱗行酒白晝靜金鴨焚香長夜清
秋深病久不得往撫卷悵望難為情

京城訪曼頭

薩都拉

城中車馬多如雲載酒問字無一人碧桃花開光艷艷
硯池水暖波粼粼先生楷書白晝靜家童畫紙烏絲勻
落花滿地送客去十年不見江南春

舟中漫興

劉儼

青天縹緲吹雲衣碧水顛倒插翠微三家五家村舍出

一點兩點沙鷗飛柳枝裊裊拂過艇苔花斑斑生釣磯
風塵不到是樂土莫怪往來城府稀

舒憐

劉伯迪

二月三月江水西千山萬山子規啼風花委地不知數
野草愁人渾欲迷衡門返棲悲舊燕中夜起坐待鳴鷄
故鄉咫尺無蹤跡南國十年猶鼓鞞

舊屋

虞集

舊屋已屬他人家臨風且復立江沙欲從子雲訪墨沼

更向少陵尋浣花

與袁伯長汎舟

水禽東去避網羅
蕩舟相逐如遠何
越山青青越女白
從此勞人魂夢多

又

春江風濤苦欲歸
東盡滄溟南斗低
明年白日百花靜
憶爾琴中烏夜啼

又

燕姬當壚玉雪清
簫中吹得鳳凰聲
不及晴江轉柂鼓
洗盞船頭沙鳥鳴

初夏

蕭應元

半清半和白晝長
似無似有綠陰香
兒童刻竹記新筍
一夜風吹一尺強

懷天錫

李孝光

月子纖纖青海頭
使船昨夜過揚州
城中高髻瓊花曲
去聽吹簫何處樓

子昂人馬圖 虞集

綠衣奴子十七八面如紅玉牽馬過繡簾美人時共看
堦前青草落花多

牧牛圖 黃清老

平原雨多煙草浮牧童驅牛如挽舟柴門正在水深處
青山流過屋西頭

過信州 高克恭

二千里地佳山水無數海棠官道傍風送落紅攬馬過

春光更比路人忙

歸舟

甘東溪

片帆懸空秋滿腹
涼月淡淡天無波
平生湖海元龍意
早入西風漁棹歌

又

天壤豈無蘇季子
恨我不識韓荆州
遥山蒼蒼暮雲碧
何許一笛蘆花秋

揚州客舍

余闕

娼家女兒名莫愁唱歌日日上江樓不是行人不願聽
門外東風好放舟

紫芝道院

滕賓

缺

風短

缺

黃埃何不隨我遊蓬萊狂歌醉舞下山去

今夜月明騎鶴來

舟過吳江

李孝光

十五女郎可憐生牽挽百丈踏泥行洗脚上船歌白苧

缺

風吹過闔閭城

淮上作


丁復

昨日水淺雀兒浴今日能勝萬斛舟人生有時亦如此
請看秦淮江水流

春俠口號

楊維禎

金凡脫手彈鸚鵡玉鞭嬉笑擊珊瑚侍兒無賴有如此
是霍家馮子都



元詩體要卷十四